



## Lisaun Ida Hodi Hakat Ba Oin Ho Dezafiu Foun Ba Estabilidade Nasional

Mahein Nia Lian Nú. 93, 26 Dezembru 2014



Relatoriu Fundasaun Mahein Nia Lian ne'e suporta husi povu Amerikanu liu husi Ajénsia Estados Unidus ba Dezenvolvimentu Internasional (USAID) no Embaxada Finlandia iha Jakarta.

Vizaun husi autor sira ne'ebé expresa iha públikasaun relatoriu sira ne'e la reprezenta vizaun husi Ajénsia Estados Unidus ba Dezenvolvimentu Internasional (USAID) no Embaxada Finlandia.



Website: [www.fundasaunmahein.org](http://www.fundasaunmahein.org)



## Kontiudu sira

Kontiudu sira	2
Introdusaun	3
Metodolojia	3
Lisaun ida depois restaurasaun independensia	3
Eransa istoriku kontinua iha faze dezenvolvimentu	5
Situasaun ne'ebé dadaun ne'e hasoru hela	7
Rekomendasaun	8
Bibliografia	9



## **Introdusaun**

Hafoin hakat liu situasaun krize tinan 2006, Governu Timor-Leste ho lema “*adeus konfliktu bem vindu ba dezenvolvimentu*”. Iha ne’ebé justifika iha situasaun dezenvolvimentu sira iha rai laran ne’ebé la’o maka’as no lalais. Situasaun hakamatek ida ne’e, sei iha mos preokupasaun seluk wainhira ONU nia mandatu ramata no Eleisaun Jeral tinan 2012 nian. Maibe justifika katak to’o formasaun V Governu Konstituisional povu moris hakmatek no dezenvolvimentu kontinua la’o maske sei iha tentativa balu ba siguransa nasional.

Maske Timor-Leste hakat dadaun ona husi tentativa lubun ne’ebé fo konsekunsia todan ba siguransa nasional. Fundasaun Mahein (FM) nia hanoin presiza halo diskusaun no analiza ba ameasa sira iha futuru nune’e mos ameasa ohin loron nia ne’ebé mai la’os ona ho forma sira konvensional ka funu ho kilat. Maibe ameasa sira naun konvensional ho rede transnacional ne’ebé kait ho ideolojia, politika, ekonomia no sosial-kultura. Iha ne’ebé ho dinamika foun no mudansa teknolojia no informasaun ne’ebé globalizadu.

Disturbu importante sira ne’ebé FM sita iha relatoriu ida ne’e hodi justifika situasaun sira pasadu iha historia siguransa nasional Timor-Leste nian. Hanesan lisaun importante ida depois restaurasaun independensia iha situasaun siguransa Timor-Leste nian. Nune’e mos eransa istoriku sira husi okupasaun Indonezia nian no organizasaun rezistensia nia movimentu kontinua iha faze dezenvolvimentu. Iha ne’ebé konsidera nu’udar ameasa ba estabilidade nasional. Ikus liu husi relatoriu ida ne’e maka situasaun sira ne’ebé dadaun ne’e Timor-Leste hasoru.

## **Metodolojia**

Metodolojia ne’ebé adopta iha relatoriu ne’e maka monitorizasaun FM nian, relatoriu media no organizasaun sosiedade sivil sira no dokumentu ofisia Estadu nian. Iha ne’ebé toka ba lisaun importante ida depois restaurasaun independensia iha situasaun siguransa Timor-Leste nian. Nune’e mos eransa istoriku sira husi okupasaun Indonezia nian no organizasaun rezistensia nia movimentu kontinua iha faze dezenvolvimentu. Iha ne’ebé konsidera nu’udar ameasa ba estabilidade nasional. Ikus liu husi relatoriu ida ne’e maka situasaun sira ne’ebé dadaun ne’e Timor-Leste hasoru. Análiza hodi konklui relatoriu ida ne’e liu husi metodu ne’ebé FM adopta maka *Security Sector Discussion (SSD)*.

## **Lisaun ida depois restaurasaun independensia**

Lisaun importante sira iha historia siguransa nasional Timor-Leste nian depois Restaurasaun Independensia loron 20 fulan Maiu tinan 2002. Insidenti dahuluk liu, iha loron 4 Dezembru 2002, liu deit fulan ne’en, mosu primeiru disturbu sosial ne’ebé halo ema hotu hakfodak no preokupa,



insidenti refere ema na'in 2 mate no 26 hetan kanek inklui estragus, sunu no asaltu hasoru instalasaun públiku no uma comunidade nian iha Kapital Dili.<sup>1</sup>

Situasaun iha momentu ne'eba komesa hafalun-an no kait ba polítika, sosial no siguransa. Konflitu sosial mosu iha fatin-fatin iha teritoriu Timor-Leste. Depois tinan rua liu, iha Fevereiro 2004 insidenti grave ida tan mosu maibe la sai boot liu. Tinan tuir mai, iha Jullu 2005, insatisfasaun sosial no polítika hahu aumenta boot, tanba kapasidade Estadu nia ba análiza situasaun ne'ebé laiha solusaun ba problema husi kedas nia abut, provoka manifestasaun organizada ida durante loron 19 iha Kapital Dili.<sup>2</sup>

Nune'e situasaun sosial komesa implika no afeita maka'as ba Governasaun. Ikus lori situasaun ba instabilidade no hamosu krize polítika no militar tinan 2006. Iha ne'ebé halo instituisaun siguransa naksobu no halo Nasaun joven monu iha situasaun instabilidade. Instituisaun FALINTIL-FDTL no PNTL nia laran nakfera no halai fahe malu. Militar no polisia sira kaer kilat se ba malu. Provoka tensaun konflitu aas, oho malu, hamosu refujiadus iha rai laran no hamate disfunsaun ba setór siguransa.<sup>3</sup>

Povu halai fahe malu, Kapital Dili sai hanesan sentru konflitu tan afeita husi liafuan "*Lorosa'e - Loromou*". Ida ne'e tentativa ida atu lori povu monu ba funu sivil. Militar no polisia sira halai sai husi Kuartel ho influensia "*Lorosa'e - Loromonu*" lori mos konsekuensia ba povu iha situasaun ida ne'e. Ikus, povu parte rua ne'e influenciadu, hatudu kro'at ba malu, sunu, estragus no idak-idak halai husik hela nia hela-fatin.

Nune'e estabilidade polítika no siguransa seidak harmonia lolos tan afeita husi situasaun krize polítika no militar nia. Liu deit tinan ida, Eleisaun Prezidencia no Parlamentar tinan 2007 forma Governu Aliansa Maioria Parlamentar (AMP), ne'ebé la simu malu entre partidu polítiku sira kona-bá formasaun Governu. Konflitu mosu iha teritoriu Timor laran tomak, oho no ataka malu entre apoiante no militante partidu polítiku sira, estraga instalasaun públiku sira, no sunu uma iha distritu sira hanesan Viqueque, Baucau, Dili no Ermera no fatin sira seluk halo povu barak sai vitima ba konsekuensia polítika.<sup>4</sup>

Tanba polítika ne'ebé seidak maduru implika mos ba situasaun sosio-kultural no ekonomia hodi kontribui ba mudansa konflitu iha Timor-Leste. Nune'e Eleisaun Jeral tinan 2007 impaktu maka'as ba koezaun sosial no polítika no ejize atensaun maka'as husi Estadu. Situasaun krize tinan 2006 no disturbu sira hafoin eleisaun. Instabilidade sai afeita maka'as hodi hafraku tiha prosesu dezvoltamentu no hamosu hanoin oin-oin katak Timor-Leste monu ona ba Estadu

---

<sup>1</sup> Relatoriu Preliminar Comissão Independente de Inquerito – CCI. (2002). Investigasaun Sobre os Graves Incidentes Ocorridos no Dia 4 de Dezembro de 2002 no Parlamentu Nasional em Dili.

<sup>2</sup> Diskursu Primeiru Ministru Kay Rala Xanana Gusmão nian iha Okaziaun Sesaun Abertura Reinaun Sesaun Abertura Timor-Leste ho Parseiru Dezenvolvimentu sira. Disponivel iha [http://timor-leste.gov.tl/wp-content/uploads/2010/04/Sesaun-Abertura-TLDPM\\_07.04.10\\_TT.pdf](http://timor-leste.gov.tl/wp-content/uploads/2010/04/Sesaun-Abertura-TLDPM_07.04.10_TT.pdf)

<sup>3</sup> Adeus Konflitu Bem-vindu Dezenvolvimentu. Programa IV Governu Konstitusional 2007-2012.

<sup>4</sup> Potensia Ameasa ba Siguransa Antes Elisaun 2012. Disponivel iha <http://www.fundasaunmahein.org>



failadu.<sup>5</sup> Depois tinan ida tuir mai, atentadu 11 Feveiriu tinan 2008, grupu sira ne'ebé konsidera nu'udar revelde halo atake ba konvoiu Primeiru Ministru iha dalan Balibar mai Dili no hakanek Prezidenti Repúblika José Ramos Horta iha nia rezidensia Metia-Aut, Dili.

### **Eransa istoriku kontinua iha faze dezvoltamentu**

Eransa importante rua iha historia Timor-Leste nian ligadu ho konflitu no konsidera hanesan ameasa ba estabilidade nasional. Grupu arte marsial sira kuiñesidu hanesan PSHT no Kera Sakti nu'udar eransa ida husi okupasaun Indonezia nian. Kontinua organiza-an depois ukun-an. KORK nu'udar organizaun foun no harii iha tempu ukun-an nian husi Timor-oan sira.

Konflitu entre grupu arte marsial iha tempu okupasaun Indonezia ho número ne'ebé kiik no ladun kuiñese husi públiku. Maske dalabalu iha manipulasaun husi militar no milisia sira kona-bá konflitu sira ne'ebé akontese. Iha tempu ukun-an arte marsial sai kuiñesidu liu ho violensia.

Nune'e mos grupu arte marsial balu influencia no afilia ba asosiasaun política ikus mai manipulasaun política mos kontribui ba konflitu arte marsial sira.<sup>6</sup> Grupu arte marsial balu sai kuiñesidu ho violensia tanba sira nia involvimentu iha rivalidade no insidenti violensia iha situasaun krize ne'ebé kauza husi fator política no involvimentu militar nian.<sup>7</sup> Inklui mos arte marsial sira ne'ebé halo konflitu nadodon malu iha rai laran no kontinua iha estranjeiru.<sup>8</sup> Konflitu entre arte marsial sira iha tinan 2007 to'o 2012 konsidera tentativa maka'as ba estabilidade nasional. Iha ne'ebé Governu no Parlamentu Nasional deside taka arte marsial popular problematiku hanesan PSHT, KORK no Kera Sakti ho rezolusaun.<sup>9</sup>

Maske Parlamentu Nasional no Governu hasai ona rezolusaun hodi solusiona. Maibe kontinua organiza-an no halo recrutamentu no treinamentu ba membru foun sira. FM nia monitorizasaun, pratika hirak ne'e kontinua akontese tanba la iha monitorizasaun diak ba rezolusaun ne'ebé hasai. Iha distritu Viqueque no distritu balu seluk, comunidade sira hato'o katak grupu arte marsial balu kontinua halo recrutamentu no treinamentu ba membru foun iha tempu kalan. Maske comunidade sira hato'o ona ba polisia maibe seidauk iha medida konkreta ruma hasoru grupu hirak ne'e. Informasaun seluk hato'o katak grupu hirak ne'e afilia mos partidu polítiku no iha tempu treinamentu nian treinador sira hato'o mos programa partidu nian no oinsa partidu bele manan iha eleisaun parlamentar tinan 2017.<sup>10</sup>

<sup>5</sup> Da Silva Gusmão, Martinho. Estado Failhado: Teoria no Praxis (2- Hotu). Diponivel iha <http://forum-haksesuk.blogspot.com/2008/05/estado-failhado-teoria-no-praxis-2-hotu.html>

<sup>6</sup> Ramos Naikoli, Antonio. Kompromisu Artes Marciais no Rituais ba Estabilidade, Seguransa no Tane soberania Nasional. Disponivel iha <http://forum-haksesuk.blogspot.com/2011/06/kompromisu-artes-marciais-no-rituais-ba.html>

<sup>7</sup> Relatoriu Belun. Dinámika Konflitu no Violensia Liga ba Arte Marsiais iha Timor-Leste.

<sup>8</sup> Arte Marsial Bandu iha Rai Laran, Nakfera iha Rai Liur. Disponivel iha <http://www.fundasaunmahein.org/2013/08/07/violence-quelled-at-home-explodes-abroad/>

<sup>9</sup> Relatoriu Belun. Dinámika Konflitu no Violensia Liga ba Arte Marsiais iha Timor-Leste.

<sup>10</sup> Monitorizasaun Fundasaun Mahein iha ne'ebé comunidade sira hato'o kona-bá atvidade arte marsial iha distritu Viqueque, iha fulan Dezembru tinan 2014.

Eransa istoriku seluk, movimentu CPD-RDTL no organizasaun refere nia existencia ne'ebé konsidera nu'udar duplikasaun forsa armada Timor-Leste nia. Iha ne'ebé halo movimentu ho farda militar iha loron importante no istoriku sira Nasaun RDTL nia. Fora husi movimentu militar CPD-RDTL mos hamosu atividade sosial kooperativa. Hanesan tinan 2012 ne'ebé organizasaun CPD-RDTL mobiliza membru tomak husi distritu 13 konsentra iha Welalohu - Manufahe organiza serbisu kooperativa. Ne'ebé hetan reazen husi komponente tomak Estadu nian, deputadu sira iha Parlamentu Nasional kondena maka'as existencia CPD-RDTL, katak grupu ilegal ne'e kontinua ilegal nafatin no kooperativa atu haforsa liu tan grupu ilegal nia existencia.<sup>11</sup>

Nune'e mos tentativa seluk ba siguransa nasional iha terseira lejislatura ka V Governu Konstitusional nia mandatu inisiu. Tinan 2013 nia rohan mosu grupu ida ne'ebé hanaran-an Konsellu Revolusaun Maubere (KRM). Grupu KRM mosu hodi ejijensia oin-oin no estetmentu kro'at hasoru Primeiru Ministru Xanana Gusmão no política Governu kona-bá moris diak maioria populasaun Timor-Leste nian.

Estetmentu kontraversial sira ne'ebé KRM no CPD-RDTL ejize maka Primeiru Ministru Xanana Gusmão atu rejigna-an tanba la susesu iha nia ukun.<sup>12</sup> Husu ba Prezidenti Repúblika uza nia kompetensia atu dezolve Parlamentu Nasional no demite Governu ho razaun katak kondisaun sosial, ekonomiku maioria populasaun Timor-Leste nia ne'ebé seidauk diak no kontinua iha liña probreza.<sup>13</sup> Nune'e mos Grupu KRM no CPD-RDTL husu atu entrega poder ba sira atu kaer ukun hodi prepara tranzisaun lideransa durante fulan 6 to'o tinan 1 hafoin entrega ba jersaun foun.<sup>14</sup>

Sai polemika liu tan no konsidera nu'udar tentativa boot ba estabilidade nasional wainhira Mauk Moruk ne'ebé nu'udar mos eis Komandante FALINTIL hamutuk ho CPD-RDTL organiza malu no halo nia akampamentu postu sentral iha Lalulai – Baucau. Uza atributu militar hanesan farda no halo formatura militar iha fatin konsentradu Lalulai ne'ebé nia membru involve eis FALINTIL sira. Governu no Parlamentu Nasional hasai rezolusaun taka CPD-RDTL no KRM tan konsidera grupu ilegal ne'ebé nia objetivu atu halo krime no forma asosiasaun kriminozu iha Timor-Leste.<sup>15</sup> Ikus mai Parlamentu Nasional no Governu liu husi Konsellu Ministru deside hapara tiha atividade refere ho rezolusaun no operasaun.

---

<sup>11</sup> Gusmão, Timotio. PN Preokupa Governu Rekoñese Kooperativa Grupo Ilegal. Disponivel iha <http://jornal.suara-timor-lorosae.com/pn-preokupa-governu-rekoinesee-kooperativa-grupo-ilegal/>

<sup>12</sup> Mauk Moruk: Xanana Tenki Rezigna an Lalais. Disponivel iha <http://www.diariutimorpost.tl/berita-1059-mauk-moruk--xanana-tenki-rezigna-lalais.html>

<sup>13</sup> Fundasaun Mahein. Operasaun Habelun Reintegra ka Ameasa? Disponivel iha <http://www.fundasaunmahein.org/2014/06/26/operasaun-habelun-reintegra-ka-ameasa/>

<sup>14</sup> Mauk Moruk: Xanana Tenki Rezigna an Lalais. Disponivel iha <http://www.diariutimorpost.tl/berita-1059-mauk-moruk--xanana-tenki-rezigna-lalais.html>

<sup>15</sup> Resolução do Parlamento Nacional (2014. Marsu. 04). De repúdio a tentativas de instabilidade e ameaças ao Estado de Direito. Disponivel iha [http://www.jornal.gov.tl/public/docs/2014/serie\\_1/serie1\\_no9.pdf](http://www.jornal.gov.tl/public/docs/2014/serie_1/serie1_no9.pdf)



FM nia hanoin operasaun la'os solusaun diak ba problema sira husi eransa istoria rezistencia nian. Iha ne'ebé mosu ho ejijensia sira sei kait ba luta rezistencia nian no situasaun dezvoltamentu sira dadaun ne'e povu infrenta. Signifika sei iha naksalak ruma iha faze ida ne'e no entre lider nasional sira. Ida ne'e presiza komponente tomak tur hamutuk no nian kontribuisaun hodi solusiona. Maske esforsu balu halo ona maibe sei iha insatisfasaun balu husi grupu sira ne'ebé konsidera hanesan ilegal no nia membru barak husi eis FALINTIL sira.

### **Situasaun ne'ebé dadaun ne'e hasoru hela**

Ameasa ohin loraun la'os ona mai ho forma konvensional ka funu ho kilat maibe ameasa sira naun konvensional ho rede transnacional. Hanesan krime organizadu ne'ebé dadaun ne'e infiltra ona iha Timor-Leste.

FM nia análise deskobre katak sidadaun Timor-Leste ne'ebé mai husi *background* oin-oin rekruta sai membru krime organizadu ho número ne'ebé boot. Iha momentu ne'ebé hanesan ezijensia nesidade moris loraun-loraun nia relasiona situasaun sosial no ekonomia ne'ebé laiha balansu. Obriga Timor-oan sira ne'ebé la biban atu ses-an krime organizadu aproveita rekruta hodi involve iha krime. Sai hetok liu tan krime organizadu rekruta mos autor prinsipal balu husi oknum Governu, kompañia no involve mos oknum autoridade siguransa balu.<sup>16</sup>

Maske nune'e Governu no Estadu seidak iha atensaun diak ba forma krime hirak ne'ebé nia operasaun bem organizadu iha Timor-Leste. Monitorizasaun FM nian deskobre katak ameasa sira ne'ebé dadaun ne'e hasoru ho forma sira organizadu hanesan trafiku ba droga, falsifikasaun dokumentu ofisial Estadu nian, fase osan, sirkulasaun osan falsu, mafiouzu no grupu kriminozu sira. Konkluziun seluk katak Timor-Leste hanesan fatin *transit* ba movimentu krime organizadu hanesan trafiku ba droga.

Hanesan FM rekomenda tiha ona iha relatoriu dahuluk liu, autoridade siguransa no ministériu relevante sira tenki halo inspesaun imediatu ba empreza sira ne'ebé hala'o atividade printing iha Timor-Leste. Ba kazu sira hanesan falsifikasaun dokumentu ofisial Estadu nian. Partikularmente ba atividade sira uza teknolojia nian hodi imprime dokumentu ofisial sira husi empreza privadu sira ne'ebé durante ne'e hala'o nia atividade. Hanesan *rental* komputador no empreza printing sira. FM deskobre katak iha balu hetan lisensan negosiu nian no balu halo operasaun ho ilegal.<sup>17</sup>

Kazu ne'ebé FM hetan katak dokumentu ofisial Estadu sira hanesan kartaun eleitoral, pasaporte, sertidaun RDTL, dokumentu viaturas nian. Dokumentu sira ne'ebé FM hetan ho

---

<sup>16</sup> Timor-Leste Iha Perigu Boot Ba Transaksaun Droga no Kilat. Disponivel iha <http://www.fundasaunmahein.org/2014/10/16/timor-leste-iha-perigu-boot-ba-transaksaun-droga-no-kilat/>

<sup>17</sup> Lakunas Siguransa Timor-Leste: Atraku ba Krime Organizadu. Disponivel iha [http://www.fundasaunmahein.org/wp-content/uploads/2014/09/MNL\\_Nu.-87\\_3009201\\_Operasaun-Krime-pdf.pdf](http://www.fundasaunmahein.org/wp-content/uploads/2014/09/MNL_Nu.-87_3009201_Operasaun-Krime-pdf.pdf)

identidade hakerek iha dokumentu hirak ne'e, identifika sidadaun balu mai husi rai viziñu Indonezia no Xineza balu.<sup>18</sup>

FM nian tauk, ida ne'e fo fatin ba grupu krime organizadu sira hodi aproveita no utiliza dokumentu falsu sira ne'e hodi hasubar-an iha Timor-Leste. Nune'e mos hodi organiza atividade krime organizadu nian. Iha ne'ebé dadaun ne'e movimentu maka'as iha rai viziñu sira ho asaun oin-oin hasoru instalasaun públiku no ema inosente sira. Ho nune'e bele justifika grupu sira ne'e nia ezistensia iha rai hotu-hotu.

FM alerta tiha ona katak Governu tenki komvoka diskusaun ka analiza sira kona-bá potencia implikasaun ba Timor-Leste. Portantu ho vulnirabilidade situasaun siguransa grupu hirak ne'e bele aproveita. Nune'e mos bele mai husi terorista migrante sira. Forma hirak ne'e hanesan gurpu krime organizadu halo trafiku ba droga no seluk-seluk tan. Portantu grupu hirak ne'e sempre buka meus no aproveita lakunas ne'ebé iha estrutura sosiedade nian ho siguransa entre Nasaun. Ida ne'e biban no faktus forte organizasaun terorista sira no nia simpatizante sira dezenvolve sira nia-an iha Nasaun viziñu sira ne'ebé besik liu Timor-Leste. Inklui Indonezia, Malaizia ho Australia. Tanba ida ne'e maka lojika duni atu halo forte lala'ok implementasaun lei iha Nasaun viziñu sira atu funu hasoru terorista sira.<sup>19</sup>

Timor-Leste relativamente fraku kona-bá lala'ok siguransa nian iha fronteira maritima no terestre bele sai biban boot terjetu ba terorista sira atu bele tama-sai fasil. Nune'e mos bele hases-an husi kontrolu autoridade siguransa nian. Senariu sira hanesan inkuantu la detekta didiak bele utiliza Timor-Leste hanesan fatin halai sees ka subar-an. Hanesan notisia sira dadaun ne'e namans hela iha media nasional hotu-hotu kona-bá trafiku droga iha Timor-Leste ne'ebé utiliza Timor-Leste hanesan *transit*.

## Rekomendasaun

1. Rekomenda ba Ministériu Defeza no Siguransa presiza halo diskusaun no avaliasaun ba situasaun siguransa nasional Timor-Leste nian hodi deskobre kle'an liu tan movimentu krime organizadu no krime transnacional nia forma no nia operasaun.
2. Rekomenda ba Komandu Jeral PNTL hodi fo orientasaun ba Komandu Distrital hotu-hotu hodi monitoriza atividade arte marsial hirak ne'ebé mensiona iha rezolusaun hodi taka arte marsial ne'ebé kuiñesidu ho violensia.

---

<sup>18</sup> Lakunas Siguransa Timor-Leste: Atraku ba Krime Organizadu. Disponivel iha [http://www.fundasaunmahein.org/wp-content/uploads/2014/09/MNL\\_Nu.-87\\_3009201\\_Operasaun-Krime-pdf.pdf](http://www.fundasaunmahein.org/wp-content/uploads/2014/09/MNL_Nu.-87_3009201_Operasaun-Krime-pdf.pdf)

<sup>19</sup> Lakunas Siguransa Timor-Leste: Atraku ba Krime Organizadu. Disponivel iha [http://www.fundasaunmahein.org/wp-content/uploads/2014/09/MNL\\_Nu.-87\\_3009201\\_Operasaun-Krime-pdf.pdf](http://www.fundasaunmahein.org/wp-content/uploads/2014/09/MNL_Nu.-87_3009201_Operasaun-Krime-pdf.pdf)





## Bibliografia

Arte Marsial Bandu iha Rai Laran, Nakfera iha Rai Liur. Disponivel iha:

<http://www.fundasaunmahein.org/2013/08/07/violence-quelled-at-home-explodes-abroad/>

Diskursu Primeiru Ministru Kay Rala Xanana Gusmão nian iha Okaziaun Sesaun Abertura Reinaun Sesaun Abertura Timor-Leste ho Parseiru Dezenvolvimentu sira. Disponivel iha

[http://timor-leste.gov.tl/wp-content/uploads/2010/04/Sesaun-Abertura-TLDPM\\_07.04.10\\_TT.pdf](http://timor-leste.gov.tl/wp-content/uploads/2010/04/Sesaun-Abertura-TLDPM_07.04.10_TT.pdf)

Fundasaun Mahein. Operasaun Habelun Reintegra ka Ameasa? Disponivel iha

<http://www.fundasaunmahein.org/2014/06/26/operasaun-habelun-reintegra-ka-ameasa/>

Gusmão, Timotio. PN Preokupa Governu Rekoñese Kooperativa Grupo Ilegal. Disponivel iha

<http://jornal.suara-timor-lorosae.com/pn-preokupa-governu-rekoinesee-kooperativa-grupu-ilegal/>

Lakunas Siguransa Timor-Leste: Atraku ba Krime Organizadu. Disponivel iha

[http://www.fundasaunmahein.org/wp-content/uploads/2014/09/MNL\\_Nu.-87\\_3009201\\_Operasaun-Krime-pdf.pdf](http://www.fundasaunmahein.org/wp-content/uploads/2014/09/MNL_Nu.-87_3009201_Operasaun-Krime-pdf.pdf)

Mauk Moruk: Xanana Tenki Rezigna an Lalais. Disponivel iha

<http://www.diariutimorpost.tl/berita-1059-mauk-moruk--xanana-tenki-rezigna-lalais.html>

Programa IV Governu Konstitusional 2007-2012.

Potensia Ameasa ba Siguransa Antes Elisaun 2012. Disponivel iha

<http://www.fundasaunmahein.org>

Relatoriu Belun. Dinámika Konflitu no Violensia Liga ba Arte Marsiais iha Timor-Leste.

Relatoriu Preliminar Comissão Independente de Inquerito – CCI. (2002). Investigasaun Sobre os Graves Incidentes Ocorridos no Dia 4 de Dezembro de 2002 no Parlamentu Nasional em Dili.

Resolução do Parlamento Nacional (2014. Marsu. 04). De repúdio a tentativas de instabilidade e ameaças ao Estado de Direito. Disponivel iha

[http://www.jornal.gov.tl/public/docs/2014/serie\\_1/serie1\\_no9.pdf](http://www.jornal.gov.tl/public/docs/2014/serie_1/serie1_no9.pdf)

Timor-Leste Iha Perigu Boot Ba Transaksaun Droga no Kilat. Disponivel iha

<http://www.fundasaunmahein.org/2014/10/16/timor-leste-iha-perigu-boot-ba-transaksaun-droga-no-kilat/>